



Comune de Terranoa



Annu nou, cumintzos noos pro s'Isportellu "bilingue" de Terranoa

TERRANOÀ – In custu primu mese de su 2023 sunt cumintzadas sas atividades de s'Isportellu de Limba de Terranoa. B'at una novidade manna: sa limba sarda at a èssere contivizada e amparada comente est istadu fatu s'annu passadu pro su gadduresu, una de sas variedades alloglolas de sa Sardigna, chi est cussa chi faghet de mere in tzitade e in sas biddas a curzu.

Custas duas limbas ant a èssere sas protagonistas de sas atividades de tradutzione e interpretariadu e ant a andare finas a foras de sas làcanas de s'isportellu, difatis si isperat in sa collaboratzione cun sas iscolas e si mirat finas a fàghere atividades in ue partetzipat totu sa comunidade. S'iscopu printzipale de sos operadores at a èssere cussu de pònnere in pràtica su chi narant sa lege natzionale 482/99 e sa lege regionale 22/2018, sa lege de s'isperantzia, chi mirant a dare contu, avalorare e ispàghere sa limba e sa cultura sarda e gadduresa.

Totu custu at a èssere possibile gràtzias a su progetu Tarranòa e Terranoa, retzidu e chircadu cun fortza dae s'amministratzione comunale de Terranoa, pro su prus dae s'Assessora Sabrina Serra, curadu dae su Istituto Chircas e finantziadu dae sa RAS pro mèdiu de sas leges mentovadas in subra.

Animados dae sa passione e dae unu ispèritu forte de appartenèntzia a sas raighinas issoro, sos isportellistas, espertos e cumpetentes, ant a èssere cuntentos de retzire cale si siat persone disizosa de preguntare informatziones subra sa limba, propònnere progetos o atividades.

S'isportellu at sa sede in su museu archeològicu e at a dispositzione 1560 oras, bene partzidas intra su sardu e su gadduresu, e at a èssere operativu pro dare cara a sa zente (atividade de front office) ogni die dae su lunis a sa chenàbura dae sas 09.00 a sas 13.00. Pro sa limba gadduresa sos operadores chi ant a manizare sas atividades sunt s'esperta Anna Maria



Comune de Terranoa

Giagheddu, sa Dut.ra Claudia Pulixi e sa Dut.ra Simona Brandano, mentres, a dare contu a sa limba sarda b'ant a pensare su Dut. Salvatore Canu, sa Dut.ra Francesca Sistu e sa Dut.ra Sabrina Sotgiu. Custos ant a èssere disponìbiles finas gràtzias a s'indiritzu mail sportellolinguistico.olbia@gmail.com e in sa pàgina facebook Tarranóa e Terranoa, chi at a èssere impitada finas pro publicare su materiale e sas atividades fatas.

A intro de su progetu ant a èssere fatos finas 2 cursos de formatzione, de 30 oras ognunu, unu pro su sardu e s'àteru pro su gadduresu, pro sos cales in sos canales istitutzionale de su comune e de s'isportellu, ant a èssere inditadas bene totus sas modalidades e sos tempos pro s'iscrìere e pro partetzipare.

In una tzitade de importu mannu, comente est Terranoa, est cosa ischida chi s'iscàmbiu de custas limbas non nche colant prus dae una generatziones a s'àtera, ma si s'esseret resessidu a bìdere s'utilidade e sa potenzialidade cuncrèta de custas limbas, custu caminu si podet cambiare. Comente un'isciaferru cando s'abbizat de àere faddidu istrada furriat, a sa matessi manera custas limbas chi sunt tuchende a s'acabu issoro, diant a pòdere mudare s'andatzu issoro e leare unu caminu nou pro torrare a bìdere sa lughe.

"Torramus a cumintzare sas atividades de s'Isportellu de Limba cun una novidade de importu mannu – narat s'Assessora Sabrina Serra – sas atividades ant a èssere in sardu e in gadduresu. Terranoa at custa bella caraterística de bilinguismu e gràtzias a s'isportellu cherimus sighire a dare contu, isparghere e sustènnere sas traditziones pro mèdiu de sa limba. Sas novidades ant a èssere medas, subra de totus sas atividades pro sas iscolas e pro sos giòvanos, e finas cursos de limba abertos a totus"

Tando, bonos cumintzos noos a s'Isportellu "Bilingue" de Terranoa e bonos cumintzos finas a su sardu e a su gadduresu.

Progetu Tarranóa e Terranoa – Finantziadu dae sa Regione Sardigna cun sa L.482/99 e cun sa L.R. 22/2018 e gestidu dae s'Istitutu Chircas